

摘藻堂四庫全書薈要

史部

欽定四庫全書薈要

史部

金史卷一百二十八

六至

詳校官編修臣程嘉謨



欽定四庫全書薈要卷六千三百六十八

金史卷一百二十六

元中書右丞相總裁托克托等修

傳第六十四

藝下

趙渢

周昂

王庭筠

子曼慶

劉昂

李經

劉從益

子祁

呂中孚

張建附

李純甫

王鬱

宋九嘉

龐鑄

李獻能

王若虛

王元節

弟元德  
孫國綱

麻九疇

李汾

元德明

子好問

趙渢字文孺東平人大定二十二年進士仕至禮部郎  
中性冲澹學道有所得尤工書自號黃山趙秉文云渢  
之正書體兼顏蘇行草備諸家體其超放又似楊凝式  
當處蘇黃伯仲間党懷英小篆李陽冰以來鮮有及者  
時人以渢配之號曰党趙有黃山集行於世

周昂字德卿真定人父伯祿字天錫大定進士仕至同知沁南軍節度使昂年二十四擢第調南和簿有異政遷良鄉令入拜監察御史路鐸以言事被斥昂送以詩語涉謗訕坐停銓久之起為龍州都軍以邊功復召為三司官大安兵興權行六部員外郎其甥王若虛嘗學於昂昂教之曰文章工於外而拙於內者可以薦四筵而不可以適獨坐可以取口稱而不可以得首肯又云文章以意為主以言為役主強而役弱則以無令不從

今人往往驕其所役至跋扈難制甚者反役其主雖極  
辭語之工而豈文之正哉昂孝友喜名節學術醇正文  
筆高雅諸儒皆師尊之既歷臺省為人所擠竟坐詩得  
罪謫東海上十數年始入翰林言事愈切出佐三司非  
所好從宗室承裕軍承裕失利跳走上谷衆欲徑歸昂  
獨不從城陷與其從子嗣明同死於難嗣明字晦之  
王庭筠字子瑞河東人生未期視書識十七字七歲學  
詩十一歲賦全題稍長涿郡王脩一見期以國士登大

定十六年進士第調恩州軍事判官臨政即有聲郡民  
鄒四者謀為不軌事覺逮捕千餘人而鄒四竄匿不能  
得朝廷遣大理司直王仲軻治其獄庭筠以計獲鄒四  
分別註誤坐預謀者十二人而已再調館陶主簿明昌  
元年三月章宗諭旨學士院曰王庭筠所試文句太長  
朕不喜此亦恐四方倣之又謂平章張汝霖曰王庭筠  
文藝頗佳然語句不健其人才高亦不難改也四月召  
庭筠試館職中選御史臺言庭筠在館陶嘗犯贓罪不

當以館閣處之遂罷乃卜居彰德買田隆慮讀書黃華山寺因以自號是年十二月上因語及學士歎其乏材參政守貞曰王庭筠其人也三年召為應奉翰林文字命與秘書郎張汝方品第法書名畫遂分入品者為五百五十卷五年八月上顧謂宰執曰應奉王庭筠朕欲以詔誥委之其人才亦豈易得近党懷英作長白山冊文殊不工聞文士多妬庭筠者不論其文顧以行止為訾大抵讀書人多口頰或相黨昔東漢之士與宦官分



朋固無足恠如唐牛僧孺李德裕宋司馬光王安石均為儒者而互相排毀何耶遂遷庭筠為翰林修撰承安元年正月坐趙秉文上書事削一官杖六十解職語在秉文傳二年降授鄭州防禦判官四年起為應奉翰林文字泰和元年復為翰林修撰扈從秋山應制賦詩三十餘首上甚嘉之明年卒年四十有七上素知其貧詔有司賻錢八十萬以給喪事求生平詩文藏之祕閣又以御製詩賜其家其引云王遵古朕之故人也乃子庭

筠又以才選直禁林者首尾十年今茲云亡玉堂東觀

無復斯人矣庭筠儀觀秀偉美談笑外若簡貴人初不

敢與接既見和氣溢於顏間殷勤慰藉如恐不及少有

可取極口稱道他日雖百負不恨也從游者如韓溫甫

路元亨張進卿李公度其薦引者如趙秉文馮璧李純

甫皆一時名士世以知人許之為文能道所欲言暮年

詩律深嚴七言長篇尤工險韻有聚辨十卷文集四十

卷書法學米元章與趙沍趙秉文俱以名家庭筠尤善

山水墨竹云子曼慶亦能詩并書仕至行省右司郎中  
自號澹游云

劉昂字之昂興州人大定十九年進士曾高而下七世  
登科昂天資警悟律賦自成一家作詩得晚唐體尤工  
絕句李純甫故人外傳云昂早得仕年三十三為尚書  
省掾調平涼路轉運副使時術士有言昂官止五品昂  
不信俄以母憂去職連蹇十年卜居洛陽有終焉之志  
有薦其才於章宗者泰和初自國子司業擢為左司郎

中會掌書大中與賈鉉漏言除授事為言者所劾獄辭連昂章宗震怒一時間人如史肅李著王宇宗室從郁皆譴逐之鉉尋亦罷政昂降上京留守判官道卒竟如術者之言

李經字天英錦州人作詩極刻苦喜出奇語不蹈襲前人李純甫見其詩曰真今世太白也由是名大震再舉不第拂衣去南渡後其鄉帥有表至朝廷士大夫識之曰此天英筆也朝議以武功就命倖其州後不知所終

劉從益字雲卿渾源人其高祖撫天會元年詞賦進士  
子孫多由科第入仕從益登大安元年進士第累官監  
察御史坐與當路辨曲直得罪去久之起為葉縣令修  
學勵俗有古良吏風葉自兵興戶減三之一田不毛者  
萬七千畝有奇其歲入七萬石如故從益請於大司農  
為減一萬民甚賴之流亡歸者四千餘家未幾被召百  
姓詣尚書省乞留不聽入授應奉翰林文字踰月以疾  
卒年四十四葉人間之以端午罷酒為位而哭且立石

頌德以致哀思從益博學強記精於經學為文章長於詩五言尤工有蓬門集子祁字京叔為太學生甚有文名值金末喪亂作歸潛志以紀金事修金史多採用焉呂中孚字信臣冀州南宮人張建字吉甫蒲城人皆有詩名中孚有清漳集建明昌初授絳州教官召為官教應奉翰林文字以老請致仕章宗愛其純素不欲令去授同知華州防禦使仍賜詩以寵之自號蘭泉有集行于世

李純甫字之甫弘州襄陰人祖安上嘗魁西京進士父采卒於益都府治中純甫幼穎悟異常初業詞賦及讀左氏春秋大愛之遂更為經義學擢承安二年經義進士為文法莊周列禦寇左氏戰國策後進多宗之又喜談兵慨然有經世心章宗南征兩上疏策其勝負上奇之給送軍中後多如所料宰執愛其文薦入翰林及大元兵起又上疏論時事不報宣宗遷汴再入翰林時丞相高琪擅威福柄擢為左司都事純甫審其必敗以母

老辭去既而高琪誅復入翰林連知貢舉正大末坐取  
人踰新格出倅坊州未赴改京兆府判官卒於汴年四  
十七純甫為人聰敏少自負其材謂功名可俯拾作矮  
栢賦以諸葛孔明王景略自期由小官上萬言書援宋  
為證甚切當路者以迂闊見抑中年度其道不行益縱  
酒自放無仕進意得官未成考旋即歸隱日與禪僧士  
子游以文酒為事嘯歌袒裼出禮法外或飲數月不醒  
人有招飲不擇貴賤必往往輒醉雖沉醉而亦未嘗廢



著書然晚年喜佛力探其奧義自類其文凡論性理及  
關佛老二家者號內藁其餘應物文字為外藁又解楞  
嚴金剛經老子莊子中庸集解鳴道集解號中國心學  
西方文教數十萬言以故為名教所貶云

王儼字飛伯大興人儀狀魁竒目光如鶻少居釣臺閉  
門讀書不接人事久之為文法柳宗元閎肆竒古動輒  
數千言歌詩俊逸效李白嘗作王子小傳以自叙天興  
初元汴京被圍上書言事不報四月圍稍解挺身突出

為兵士所得其將遇之甚厚鬱徑行無機防為其下所  
忌見殺臨終懷中出書曰是吾平生著述可傳付中州  
士大夫曰王鬱死矣年三十餘同時以詩鳴者雷瑄侯  
冊王元粹云

宋九嘉字飛卿夏津人為入剛直豪邁少遊太學有能  
賦聲長從李純甫讀書為文有奇氣與雷淵李經相伯  
仲中至寧元年進士第歷藍田高陵扶風三水四縣令  
咸以能稱入為翰林應奉正大中以疾去沒於癸巳之

難

龐鑄字才卿遼東人少擢第仕有聲南渡後為翰林待制遷戶部侍郎坐游貴戚家出倅東平改京兆路轉運使卒博學能文工詩造語奇健不凡世多傳之

李獻能字欽叔河中人先世有為金吾衛上將軍者時號李金吾家追獻能昆弟皆以文學名從兄獻卿獻誠從弟獻甫相繼擢第故李氏有四桂堂獻能苦學博覽於文尤長於四六貞祐三年特賜詞賦進士廷試第一

人宏詞優等授應奉翰林文字在翰苑凡十年出為鄜  
州觀察判官用薦者復為應奉俄遷修撰正大末以鎮  
南軍節度副使充河中帥府經歷官大元兵被河中奔  
陝州行省以權左右司郎中值趙三三軍變遇害年四  
十三獻能為人眇小而墨色頗有髯善談論每敷說今  
古聲鏗亮可聽作詩有志於風雅又刻意樂章在翰院  
應機敏捷號得體趙秉文李純甫嘗曰李獻能天生今  
世翰苑材故每薦之不令出館家故饒財盡於貞祐之

亂在京師無以自資其母素豪奢厚於自奉小不如意則必訶譴人視之殆不堪憂獻能處之自若也時人以純孝稱之嘗謂人云吾幼夢官至五品壽不至五十後竟如其言

王若虛字從之橐城人也幼穎悟若夙昔在文字間者擢承安二年經義進士調鄜州錄事歷管城門山二縣令皆有惠政秩滿老幼攀送數日乃得行用薦入為國史院編修官遷應奉翰林文字奉使夏國還授同知泗

州軍州事留為著作佐郎正大初章宗宣宗實錄成遷  
平涼府判官未幾召為左司諫後轉延州刺史入為直  
學士天興元年哀宗走歸德明年春崔立變羣小附和  
請為立建功德碑翟奕以尚書省命召若虛為文時奕  
輩恃勢作威人或少忤則讒搆立見屠滅若虛自分必  
死私謂左右司員外郎元好問曰今召我作碑不從則  
死作之則名節掃地不若死之為愈雖然我姑以理諭  
之乃謂奕輩曰丞相功德碑當指何事為言奕輩怒曰

丞相以京城降活生靈百萬非功德乎曰學士代王言  
功德碑謂之代王言可乎且丞相既以城降則朝官皆  
出其門自古豈有門下人為主帥誦功德而可信乎後  
世哉奕輩不能奪乃召太學生劉祁麻革輩赴省好問  
張信之喻以立碑事曰衆議屬二君且已白鄭王矣二  
君其無讓祁等固辭而別數日促迫不已祁即為草定  
以付好問好問意未愜乃自為之既成以示若虛乃共  
刪定數字然止直叙其事而已後兵入城不果立也金

亡微服北歸鎮陽與渾源劉郁東游泰山至黃峴峰憇  
萃美亭顧謂同游曰汨沒塵土中一生不意晚年乃造  
仙府誠得終老此山志願畢矣乃令子忠先歸遣子恕  
同行視夷險因垂足坐大石上良久瞑目而逝年七十  
所著文章號慵夫集凡若干卷淳南遺老若干卷傳於  
世

王元節字子元弘州人也祖山甫遼戶部侍郎父誦海  
陵朝左司員外郎元節幼穎悟雖家世貴顯而從學甚



謹渾源劉撝愛其才俊以女妻之遂傳其賦學登天德  
三年詞賦進士第雅尚氣節不能隨時俯仰故仕不顯  
及遷密州觀察判官既罷即逍遙鄉里以詩酒自娛號  
曰遯齋年五十餘卒有詩集行於世弟元德亦第進士  
有能名於時終南京路提刑使孫國綱字正之業儒術  
尤長吏事為人端重樂易或有忤者略不與校亦未嘗  
形于怒色大定三年試補尚書吏部掾未幾轉御史臺  
令史宣宗聞其材幹興定三年特召為近侍奉職承應

甚見寵遇勒留凡三考出為同知申州事無何召為筆  
硯直長擢監察御史秩滿勒留再任蓋知其材器故也  
開興元年關陝完顏總帥屯河中府與大元軍戰敗績  
哀宗遣國綱乘上廐馬徑詣河中間敗軍之由還至中  
途值大兵見殺時年四十四

麻九疇字知幾易州人三歲識字七歲能草書作大字  
有及數尺者一時目為神童章宗召見問汝入宮殿中  
亦懼怯否對曰君臣父子也子寧懼父耶上大奇之弱

冠入太學有文名南渡後寓居鄧蔡間入遂平西山始以古學自力博通五經於易春秋為尤長興定末試開封府詞賦第二經義第一再試南省復然聲譽大振雖婦人小兒皆知其名及廷試以誤黜士論惜之已而隱居不為科舉計正大初門人王說王采苓俱中第上以其年幼怪而問之及知嘗師九疇平章政事侯摯翰林學士趙秉文連章薦之特賜盧亞榜進士第以病未拜官告歸再授太常寺太祝權博士俄遷應奉翰林文字

九疇性資野逸高蹇自便與人交一語不相入則逕去  
不返顧自度終不能與世合頃之復謝病去居郾城天  
興元年大元兵入河南挈家走確山為兵士所得驅至  
廣平病死年五十九疇初因經義學易後喜邵堯夫皇  
極書因學算數又喜卜筮射覆之術晚更喜醫與名醫  
張子和遊盡傳其學且為潤色其所著書為文精密奇  
健詩尤工緻後以避謗忌持戒不作明昌以來稱神童  
者五人太原常漆壽四歲能作詩劉滋劉微張漢臣後

皆無稱獨知幾能自樹立者舊如趙秉文以徵君目之而不名

李汾字長源太原平晉人為人尚氣跌宕不羈性褊躁觸之輒怒以是多為人所惡喜讀史工詩雄健有法避亂入關京兆尹子容愛其材招致門下留二年去之涇州謁左丞張行信一見即以上客禮之元光間游大梁舉進士不中用薦為史館書寫書寫特抄書小史耳凡編修官得日錄纂述既定以藁授書寫書寫錄潔本呈

翰表汾既為之殊不自聊時趙秉文為學士雷淵李獻能皆在院刊修之際汾在旁正襟危坐讀太史公左邱明一篇或數百言音吐洪暢旁若無人既畢顧四坐漫為一語云看秉筆諸人積不平而雷李尤切齒乃以嫚罵官長訟于有司然時論亦有不直雷李者尋罷入闕明年來京師上書言時事不合去客唐鄧間恒山公武仙署行尚書省講議官既而仙與參知政事完顏色埒相異同頗謀自安懼汾言論欲除之汾覺遁泌陽仙令

總帥王德追獲之鎖養馬坪絕食而死年未四十汾平生詩甚多不自收集世所傳者十二三而已

元德明系出拓拔魏太原秀容人自幼嗜讀書口不言世俗鄙事樂易無畦畛布衣疏食處之自若家人不敢以生理累之累舉不第放浪山水間飲酒賦詩以自適年四十八卒有東嵒集三卷子好問最知名好問字裕之七歲能詩年十有四從陵川郝晉卿學不事舉業淹貫經傳百家六年而業成下太行渡大河為箕山琴臺

等詩禮部趙秉文見之以為近代無此作也於是名震  
京師中定興五年第歷內鄉令正大中為南陽令天興  
初擢尚書省掾頃之除左司都事轉行尚書省左司員  
外郎金亡不仕為文有繩尺備衆體其詩奇崛而絕雕  
剗巧縛而謝綺麗五言高古沉鬱七言樂府不用古題  
特出新意歌謠慷慨挾幽并之氣其長短句揄揚新聲  
以寫恩怨者又數百篇兵後故老皆盡好問蔚為一代  
宗工四方碑板銘志盡趨其門其所著文章詩若干卷



杜詩學一卷東城詩雅三卷錦機一卷詩文自警十卷  
晚年尤以著作自任以金源氏有天下典章法度幾及  
漢唐國亡史作已所當任時金國實錄在順天張萬戶  
家乃言於張願為撰述既而為樂夔所沮而止好問曰  
不可令一代之跡泯而不傳乃構亭於家著述其上因  
名曰野史凡金源君臣遺言往行采摭所聞有所得輒  
以寸紙細字為記錄至百餘萬言今所傳者有中州集  
及壬辰雜編若干卷年六十八卒纂修金史多本其所

著云

贊曰翰昉吳激楚材而晉用之亦足為一代之文矣蔡  
珪馬定國之該博胡礪楊伯仁之敏瞻鄭子聃麻九疇  
之英雋王欽宋九嘉之邁往三李卓犖純甫知道汾任  
氣獻能尤以純孝見稱王庭筠党懷英元好問自足知  
名異代王競劉從益王若虛之吏治文不掩其所長蔡  
松年在文藝中爵位之最重者道金人言利興黨獄殺  
田穀文不能掩其所短者歟事繼母有至行其死家無

餘資有足取云

金史卷一百二十六

欽定四庫全書蒼要卷六千三百六十九

金史卷一百二十七

元中書右丞相總裁托克托等修

列傳第六十五

孝友

溫特赫鄂勒博

陳

顏

劉

瑜

孟興

王

震

劉

政

孝友者人之至行也而恒性存焉有子者欲其孝有弟

者欲其友豈非人之恒情乎為子而孝為弟而友又豈  
非人之恒性乎以人之恒情責人之恒性而不副所欲  
者恒有焉有竭力於是豈非難乎天生五穀以養人五  
穀之有恒性也服田力穡以望有秋農夫之有恒情也  
五穀熟人民育豈異事乎然以唐虞之世黎民阻飢不  
免以命稷百姓不親五品不遜不免以命契以是知順  
成之不可必猶孝友之不易得也是故有年大有年以  
異書於聖人之經孝友以至行傳於歷代之史勸農興

孝之教不廢於歷代之政孝弟力田自漢以來有其科  
章宗嘗言孝義之人素行已備雖有希覲猶不失為行  
善庶幾帝王之善訓矣夫金世孝友見於旌表載於史  
冊者僅六人焉作孝友傳

溫特赫鄂勒博西北路松科碩碩歡明安人年十五居  
父喪不飲酒食肉廬于墓側母疾刲股肉療之疾愈詔  
以為護衛

陳顏衛州汲縣人世業農父光宋季擢武舉第調壽陽

尉未赴值金兵取汴光病圍城中顏間闕渡河往省其父因扶疾北歸光家奴瑪哩布哈誣告光與賊殺人光繫獄榜掠不勝因自誣服顏詣郡請代父死太守徐某哀之不敢決適帥臣至郡以其狀白帥曰此真孝子也遂併釋之天會七年詔旌表其門閭

劉瑜棣州人家貧甚母喪不能具葬乃質其子以給喪事明昌三年詔賜粟帛復其終身

孟興蚤喪父事母孝謹母沒喪葬盡禮事兄如事其父



明昌三年詔賜帛十匹粟二十石

王震寧海州文登縣人為進士學母患風疾剗股肉雜  
飲食中疾遂愈母沒哀泣過禮目生翳服除目不療而  
愈皆以為孝感所致特賜同進士出身詔尚書省擬注  
職任

劉政洛州人性篤孝母老喪明政每以舌舐母目逾旬  
母能視物母疾晝夜侍側衣不解帶剗股肉啖之者再  
三母死負土起墳鄉隣欲佐其勞政謝之葬之日飛鳥

哀鳴翔集邱木間廬於墓側者三年防禦使以聞除太  
子掌飲丞

隱逸

褚承亮

王去非

趙質

杜時昇

郝天挺

薛繼先

高仲振

張潛

王汝梅

宋可

辛愿

王予可

孔子稱逸民伯夷叔齊夷逸朱張柳下惠少連其立心

造行之異固各有所稱謂而柳下惠則又嘗仕於當世者也長沮桀溺之徒則無所取焉後世凡隱遯之士其名皆列於史傳何歟蓋古之仕者其志將以行道其為貧而仕下列者猶必先事而後食焉後世干祿者多其先人尚人之志與歎老嗟卑之心能去是者鮮矣故君子於仕之遠引高蹈者特稱述之庶聞其風猶足以立懦廉頑也作隱逸傳

褚承亮字茂先真定人宋蘇軾自定武謫官過真定承

亮以文謁之大為稱賞宣和五年秋應鄉試同試者八百人承亮為第一明年登第調易州戶曹未起會金兵南下天會六年幹里雅布既破真定拘籍境內進士試安國寺承亮名亦在籍中匿而不出軍中知其才嚴令押赴與諸生對策策問上皇無道少帝失信舉人承風旨極口詆毀承亮詣主文劉侍中曰君父之罪豈臣子所得言耶長揖而出劉為之動容餘悉放第凡七十二人遂號七十二賢榜狀元許必仕為郎官一日出左掖門

墮馬首中閫石死餘皆無顯者劉多承亮之誼薦之橐  
城縣漫應之即棄去年七十終門人私謚曰玄貞先生  
子席珍正隆二年進士官州縣有聲

王去非字廣道平陰人嘗就舉不得意即屏去督妻孥  
耕織以給伏臘家居教授束脩有餘輒分惠人弟子班  
忱貧不能朝夕一女及笄去非為辦資裝嫁之北隣有  
喪忌東出西與北皆人居南則去非家去非壞蠶室使  
喪南出遂得葬焉大定二十四年卒年八十四

趙質字景道遼相思溫之裔大定末舉進士不第隱居

燕城南教授為業明昌間章宗遊春水過焉聞絃誦聲

幸其齋舍見壁間所題詩諷誄久之賞其志趣不凡召

至行殿命之官固辭曰臣僻性野逸志在長林豐草金

鑣玉絡非所願也況聖明在上可不容巢由為外臣乎

上益竒之賜田畝千復之終身泰和二年卒年八十五

杜時昇字進之霸州信安人博學知天文不肯仕進承

安泰和間宰相數薦時昇可大用時昇謂所親曰吾觀

正北赤氣如血東西亘天天下當大亂亂而南北當合  
為一消息盈虛循環無端察往考來孰能違之是時風  
俗侈靡紀綱大壞世宗之業遂衰時昇乃南渡河隱居  
嵩洛山中從學者甚衆大抵以伊洛之學教人自時昇  
始正大間大元兵攻潼關拒守甚堅衆皆相賀時昇曰  
大兵皆在秦鞏間若假道於宋出襄漢入宛葉鐵騎長  
驅勢如風雨無高山大川為之阻土崩之勢也頃之大  
元兵果自饒風關涉襄陽出南陽金人敗績于三峯山

汴京不守皆如時昇所料云正大末卒

郝天挺字晉卿澤州陵川人早衰多疾厭於科舉遂不復充賦太原元好問嘗從學進士業天挺曰今人賦學以速售為功六經百家分磔緝綴或篇章句讀不之知幸而得之不免為庸人又曰讀書不為藝文選官不為利養唯通人能之又曰今仕多以貪敗皆以苦饑寒不能自持耳丈夫不耐饑寒一事不可為子以吾言求之科舉在其中矣或曰以此學進士無乃戾乎天挺曰正



欲渠不為舉子爾貞祐中居河南往來淇衛間為人有  
崖岸耿耿自信寧落魄困窮終不一至豪富之門年五  
十終于舞陽

薛繼先字曼卿南渡後隱居洛西山中課童子讀書事  
母孝與人交謙遜和雅所居化之子純孝字方叔有父  
風有詐為曼卿書就方叔取物者曼卿年已老狀貌如  
少者客不知其為曼卿而以為方叔也而與之書曼卿  
如所取付之監察御史石玠行部過曼卿曼卿不之見

或言君何無鄉曲情曼卿曰君未之思耳凡今時政未必皆善御史一有所劾將謂自我發之同惡相庇他日并鄰里必有受禍者其畏慎皆此類壬辰之亂病沒宜陽

高仲振字正之遼東人其兄領開封鎮兵仲振依之以居既而以家業付其兄挈妻子入嵩山博極羣書尤深易皇極經世學安貧自樂不入城市山野小人亦知敬之嘗與其弟子張潛王汝梅行山谷間人望之翩然如

仙或曰仲振嘗遇異人教以養生術嘗終日燕坐骨節  
戛戛有聲所談皆世外事有扣之者輒不復語云

張潛字仲升武清人幼有志節慕荆軻聶政為人年三  
十始折節讀書時人高其行誼目曰張古人後客崧山  
從仲振受易年五十始娶魯山孫氏亦有賢行夫婦相  
敬如賓負薪拾穗行歌自得不知其貧也鄰里有為潛  
種瓜者及熟讓潛潛弗許竟分而食之嘗行道中拾一  
斧夫婦計度移時乃持歸訪其主還之里有兄弟分財

者其弟曰我家如此獨不畏張先生知耶遂如初天興  
間潛挈家避兵少室乃不食七日死孫氏亦投絕澗死  
焉

王汝梅字大用大名人始由律學為伊陽簿秩滿遂隱  
居不仕性嗜書動有禮法生徒以法經就學者兼授以  
經學諸生服其教無敢為非義者同業嘗憫其貧時周  
之皆謝不受後不知所終

宋可字予之武涉人其姑適太族橐氏貞祐之兵夫及

子皆死於難姑以白金五十笏遺可可受不辭其後姑得豪氏疏族立為後挈之省外家可乃置酒會鄉鄰謂姑曰姑往時遺可以金可以豪氏無子故受之今有子矣此金豪氏物非姑物也可何名取之因呼妻子舁金歸之鄉里用是重之未幾北兵駐山陽軍中有聞可名者訪知所在質其子使人招之曰從我者禍福共之不然汝子死矣親舊競勸之往可皆謝不從曰吾有子無子與吾兒死生皆有命焉豈以一子故併平生所守者

亡之後竟以無子

辛愿字敬之福昌人年二十五始知讀書取白氏諷諫集自試一日便能背誦乃聚書環堵中讀之至書伊訓詩河廣頗若有所省欲罷不能因更致力焉由是博極書史作文有繩尺詩律精嚴有自得之趣性野逸不修威儀貴人延客麻衣草屨足脰赤露坦然於其間劇談豪飲傍若無人嘗謂王鬱曰王侯將相世所共嗜者聖人有以得之亦不避得之不以道與夫居之不能行已

之志是欲澡其身而伏於厠也是難與他人道子宜保  
之其志趣如此後為河南府治中高廷玉客廷玉為府  
尹溫特赫福興所誣愿亦被訊掠幾不得免自是生事  
益狼狽愿雅負高氣不能從俗俯仰迫以饑凍流離往  
往見之于詩有詩數千首常貯竹橐中正大末歿洛下  
其詩有云黃綺暫來為漢友巢由終不是唐臣真處士  
語也

王予可字南雲河東吉州人父本軍校予可亦嘗隸籍

年三十許大病後忽發狂久之能把筆作詩文及說世  
外恍惚事南渡後居上蔡遂平郾城之間遇文士則稱  
大成將軍於佛前則稱諦摩龍什于道則稱騶天玄俊  
於貴游則稱威錦堂主人為人軀幹雄偉貌奇古載青  
葛巾項後垂雙帶若牛耳一金鏤環在項額之間兩頰  
以青涅之為翠靨衣常不能掩脛落魄嗜酒每入城市  
人爭以酒食遺之夜宿土室中夏月或尸穢在傍蛆蟲  
狼藉不恤也人與之紙落筆數百言或詩或文散漫碎



雜無句讀無首尾多六經中語及韻學家古文奇字字畫峭勁遇宋諱亦時避之或問以故事其應如響諸所引書皆世所未見談說之際稍若有條貫則又以誕幻語亂之麻九疇張穀與之游最狎言其詩以百分為率可曉者才二三耳壬辰兵亂為順天將領所得知其名竊議欲挈之北歸館於州之瑞雲觀予可明日見將領自言曰我不能住君家瑞雲觀也不數日卒後復有見於淮上者

贊曰金世隱逸不多見今於簡冊所有得十有二人焉  
其卓爾不羣者三人褚承亮宋人勒試進士主司發策  
問宋徽欽之罪承亮長揖而去之方金人重舉業杜時  
昇居山中首以伊洛之學教後進宋可不願仕人執其  
子為質寧棄而不就遂以無子雖制行過中豈不賢於  
殺妻以求大將者乎大夫士見善明用心剛故能為人  
所難為者如此

金史卷一百二十七

欽定四庫全書薈要卷六千三百七十

金史卷一百二十八

元中書右丞相總裁托克托等修

列傳第六十六

循吏

盧克忠

牛德昌

范承吉

王

政

本名努色爾

張

奕

李

瞻

劉敏行

傅慎微

劉煥

高昌福

孫德淵

趙鑑

富察鄭留

鈕祜祿守愚

本名和倫克們

舒穆魯元

張毅

趙重福

武都

赫舍哩德

張特立

王

浩

師夔等附

金自穆宗號令諸部不得稱達貝勒於是諸部始列於  
統屬太祖命三百戶為穆昆十穆昆為明安一如郡縣  
置吏之法太宗既有中原申畫封疆分建守令熙宗遣  
廉察之使循行四方世宗承海陵彫剝之餘休養生息

迄于明昌承安之間民物滋殖循吏迭出焉泰和用兵  
郡縣多故吏治衰矣宣宗尚刀筆之習嚴考核之法能  
吏不乏而豈弟之政罕見稱述焉金百餘年吏治始終  
可攷於是作循吏傳

盧克忠貴德州鳳集人高永昌據遼陽克忠走詣金源  
郡王幹魯營降遂以薩固察為鄉導幹魯克東京永昌  
走長松島克忠與渤海人托卜嘉追獲之收國二年授  
世襲穆昆其後定燕伐宋皆與有功除登州刺史改刺

澶州天德間同知保大軍節度使綏德州軍卒數人道  
過鄜城求宿民家是夜有賊剽主人財而去有司執假  
宿之卒繫獄榜掠誣服克忠察其寃獨不肯署未幾果  
得賊假宿之卒遂釋大定二年除北京副留守會民艱  
食克忠下令凡民有蓄積者計留一歲悉平其價糶之  
由是無捐瘠之患轉陳州防禦使後以靜難軍節度使  
致仕卒

牛德昌字彥欽蔚州定安人父鐸遼將作大監德昌少

孤其母教之學有勸以就蔭者其母曰大監遺命不使作承奉也中皇統二年進士第調礬山簿遷萬泉令屬蒲陝薦饑羣盜充斥州縣城門晝閉德昌到官即日開城門縱百姓出入榜曰民苦饑寒剽掠鄉聚以偷旦夕之命甚可憐也能自新者一不問賊皆感激解散縣境以安府尹王伯龍嘉之禮待甚厚累官刑部吏部侍郎中都路轉運使廣寧太原尹卒贈中奉大夫

范承吉字寵之好問學屬遼季盜賊起雖避地未嘗廢

書天慶八年中進士丙科授秘書省校書郎至大定府  
金源令歸朝為御前承應文字天眷初遷殿中少監四  
年從攻太原遷少府監五年宗翰克宋所得金珠承吉  
司其出入無毫髮欺及還犢車載書史而已尋遷昭文  
館直學士知絳州先是軍興民有為將士所掠而逃歸  
者承吉使吏遍諭俾其自實凡數千具白元帥府許自  
贖為良或貧無貲者以公厨代輸六年改河東北路轉  
運使時承宋季之弊民賦繁重失當承吉乃為經畫立



法簡便所入增十數萬斛官既足而民有餘厯同知平陽尹西京副留守遷河東南路轉運使改同簽燕京留守事順天軍節度使屬地震壞民廬舍有欲爭先營葺者工匠過取其直承吉命官屬董其役先後以次不問貧富民賴以省費厯鎮西軍節度使行臺禮部尚書泰寧軍節度使復鎮順天奚卒散居境內率數千人為盜承吉繩以法不少貸懼而不敢犯貞元二年以光祿大夫致仕卒年六十六

王政辰州熊岳人也其先任渤海及遼皆有顯者政當

遼季亂浮沉州里高永昌據遼東知政材略欲用之政

度其無成辭謝不就永昌敗渤海人爭縛永昌以為功

政獨逡巡引退吳王棟摩聞而異之言於太祖授廬州

渤海軍穆昆從破白霄下燕雲及金兵伐宋滑州降留

政為安撫使前此數州既降復殺守將及為宋守及是

人以為政憂政曰苟利國家雖死何避宋王宗望壯之

曰身沒王事利及子孫汝言是也政從數騎入州是時

民多以饑為盜坐繫政皆釋之發倉廩以賑貧乏於是  
民皆悅不復叛傍郡聞之亦多降者宋王召政遂至轅  
門撫其背曰吾以汝為死矣乃復成功耶慰諭者久之  
天會四年為燕京都麴院同監未幾除同知金勝軍節  
度使事改權侍衛親軍都指揮使兼掌軍資是時軍旅  
始定筦庫紀綱未立掌吏皆因緣為姦政獨明會計嚴  
局鑄金帛山積而出納無錙銖之失吳王棟摩戲之曰  
汝為官久矣而貧不加富何也對曰政以楊震四知自

守安得不貧吳王笑曰前言戲之耳以黃金百兩銀五百兩及所乘馬遺之六年授左監門將軍歷安州刺史檀州軍州事戶吏房主事天眷元年遷保靜軍為節度使致仕卒年六十六政本名努色爾嘗使高麗因改名政子遵仁遵義遵古遵古有傳

張奕字彥微其先澤州高平人以廕補官任齊為歸德府通判齊國廢齊兵之在郡者二萬人謀為亂約夜半舉燎相應奕知之選市人丁壯授以兵結陣扼其要巷

開小南門以示生路亂不得作比明亡匿略盡擒其首  
惡誅之後五日都統完顏倫布以軍至歸德欲根株餘  
黨奕以闔門保郡人無他遂止行臺承制除同知歸德  
尹天眷元年以河南與宋改同知沂州防禦使事三年  
宗弼復取河南徵奕赴行省既定汴京授汴京副留守  
歷陳秦州防禦使同知太原尹晉寧軍報夏人侵界詔  
奕往征之奕至境上按籍各歸所侵土還奏曰折氏世  
守麟府以抗夏人本朝有其地遂以與夏夏人夷折氏

墳壠而戮其屍折氏怨入骨髓而不得報也今復使守  
晉寧故激怒夏人使為鼠侵而條上其罪苟欲開邊釁  
以雪私讐耳獨可徙折氏他郡則夏人自安朝廷從之  
遂移折氏守青州正隆間同知西京留守事遷河東北  
路轉運使大定二年徵為戶部尚書甫視事得疾卒

李瞻薊州玉田人遼天慶二年進士為平州望雲令張  
覺據平州叛以瞻從事宗望復平州覺亡去城中復叛  
瞻踰城出降其子不能出為賊所害宋王宗望嘉之承

制以為興平府判官天會三年遷大理少卿從宗望南  
伐為漢軍糧料使四年金兵圍汴宋人請割河北三鎮  
贍與禮部侍郎李天翼安撫河北東西兩路略定懷濟  
衛等州衛湯陰等縣七年知寧州累遷德州防禦使為  
政寬平民懷其惠相率詣京師請留者數百千人貞元  
三年遷濟州路轉運使改忠順軍節度使正隆末盜賊  
蜂起贍增築城壘為備蔚人賴之以安大定初卒于官  
劉敏行平州人登天會三年進士除太子校書郎累遷

肥鄉令歲大饑盜賊掠人為食諸縣老弱入保郡城不敢耕種農事廢畝荒蕪敏行白州借軍士三十護縣民出耕多張旗幟為疑兵敏行率軍巡邏日暮則閱民入城由是盜不敢犯而耕稼滋殖轉高平令縣城圯壞久不修大盜橫恣掠縣鎮不能禦敏行出已俸率僚吏出錢顧役繕治百姓欣然從之凡用二千人版築遂完鄉村百姓入保賊至不能犯累遷為河北東路轉運使致仕卒



傅慎微字幾先其先秦州沙溪人後徙建昌慎微遷居  
長安宋末登進士累官河東路經制使宗翰已克汴京  
使羅索定陝西慎微率衆迎戰兵敗被獲送至元帥府  
元帥宗翰愛其才學弗殺羈置歸化州希尹收置門下  
宗弼復取河南地起為陝西經略使尋權同州節度使  
事明年陝西大旱饑死者十七八以慎微為京兆鄜延  
環慶三路經濟使許以便宜慎微募民入粟得二十餘  
萬石立養濟院飼餓者全活甚衆改同知京兆尹權陝

西諸路轉運使復修三白龍首等渠以溉田募民屯種  
貸牛及種子以濟之民賴其利轉中京副留守用廉改  
忻州刺史累遷太常卿除定武軍節度使移靜難軍忤  
用事者蘇保衡救之得免大定初復為太常卿遷禮部  
尚書與翰林侍講學士圖克坦子溫翰林待制伊喇熙  
載俱兼同修國史卒年七十六慎微博學喜著書嘗奏  
興亡金鏡錄一百卷性純質篤古喜談兵時人以為迂

閻云

劉煥字德文中山人宋末兵起城中久乏食煥尚幼煮糠覈而食之自飲其清者以醲厚者供其母鄉里異之稍長就學天寒擁糞火讀書不怠登天德元年進士調任丘尉縣令貪汙煥每規正之秩滿令持盃酒謝曰尉廉慎使我獲考調中都市令樞密使布薩呼圖家有條結工牟利於市不肯從市籍役煥繫之呼圖召煥煥不往暴工罪而答之煥初除市令過謝鄉人吏部侍郎石琚琚不悅曰京師浩穰不與外郡同棄簡就煩吾所不

曉也至是始重之以廉升京兆推官再遷北京警巡使  
捕二惡少杖于庭中戒之曰孝弟敬慎則為君子暴戾  
隱賊則為小人自今以往無徂于故習國有明罰吾不  
得私也自是衆皆畏憚無敢犯者召為監察御史父老  
數百人或卧車下或挽其靴銓曰我欲復留使君期年  
不可得也以本官攝戶部員外郎代州錢監雜青銅鑄  
錢錢色惡類鐵錢民間盜鑄抵罪者衆朝廷患之下尚  
書省議煥奏曰錢寶純用黃銅精治之中濡以錫若青

銅可鑄歷代何緣不用自代州取二分與四六分青黃  
雜糅務省銅而功易就由是民間盜鑄陷罪者衆非朝  
廷意也必欲為天下利宜純用黃銅得數少而利遠其  
新錢已流行者宜驗數輸納準換從之再遷管州刺史  
耆老數百人疏其著蹟十一事詣節鎮請留煥曰刺史  
守職奉法乞留之以廉升鄭州防禦使遷官一階轉同  
知北京留守事世宗幸上京所過州郡大發民夫治橋  
梁馳道以希恩賞煥所部惟平治端好而已上嘉其意

遷遼東路轉運使卒

高昌福中都宛平人父履遼東史中丞致仕太宗聞其名召之未及入見而卒特詔昌福釋服應舉登天會十年進士第補樞密院令史明年辟元帥府令史皇統初宗弼復河南元帥府治汴人有疑似被獲皆目為宋謀者即殺之昌福讞得其實釋去者甚衆許州都統韓常用法嚴好殺人遣介送囚於汴或道亡監吏自度失囚恐得罪欲盡殺諸囚以滅口昌福識監吏意窮竟其狀

免死者十七八而諸吏遂怨昌福欲構害之是時方用兵梁楚間夜多陰雨元帥府選人偵宋兵動靜諸吏遣昌福昌福不辭即行盡得敵軍虛實報元帥府師還除震武軍節度副使轉行臺禮部員外郎天德間行臺罷改絳陽軍節度副使入為兵部員外郎改河間少尹世宗即位上書陳便宜事上披閱再三因謂侍臣曰內外官皆上書言事可以知人材優劣不然朕何由知之三除同知東京留守事治最遷山東西路轉運使工部尚

書改彰德軍節度使上書言賦稅太重上問翰林學士張景仁曰稅法比近代為輕而以為重何也景仁曰今之稅殊輕若復輕之國用且不足事遂寢累遷河中尹致仕卒

孫德淵字資深興中州人也。大定十六年進士調石州軍事判官涑水丞察廉遷沙河令有盜秋桑者主逐捕之盜以刃自刺其足面曰秋桑例不禁採汝何得刺我主懼賂而求免盜不從訴之縣德淵曰若逐捕而傷瘡



必在後今在前乃自刺也盜遂引服遷尚書省令史不就丁父憂去官民為刻石祠之察廉起復北京轉運司都勾判官以累薦遷中都左警巡使監察御史山東東路轉運副使累官大理丞兼左拾遺審官院奏德淵剛正幹能可任繁劇遂再任丁母憂服除特遷恩州刺史入為右司郎中滕州刺史遷同知河間府事歷大興治中同知府事大安初遷盤安軍節度使改河北西路按察轉運使尋改昭義軍節度使潞州破被執俄有拜于

前者皆沙河舊民也密護德淵遂得脫貞祐二年拜工部尚書攝御史中丞是時山東乏兵食有司請鬻恩例舉人居喪者亦許納錢就試德淵奏此大傷名教事遂寢尋致仕監察御史許古論德淵忠亮明敏可以大用近許告老士大夫竊歎望朝廷起復必能建明以利國家宣宗嘉納未及用而卒

趙鑑字擇善濟南章丘人宋建炎二年進士調廬州司理參軍是時江淮方用兵鑑棄官還鄉里齊國建除厯

城丞轉長清令皆劇邑難治鑑政甚著劉豫召見遷直  
秘閣提舉涇原路弓箭手兼提點本路刑獄公事戒之  
曰邊將多不法可痛繩之原州守將武悍自用以鑑年  
少易之鑑發其姦守將坐免郡縣聞風無敢犯者齊廢  
除知城陽軍改山東東路轉運副使攝行臺左司郎中  
行臺宰相欲以故宋宦者權都水監鑑曰誤國闖豎汴  
人視為寇讐付以美官將失人望遂不用以母憂解職  
天德初起為濟州刺史移涿州海陵召鑑入朝應對失

旨遣還郡俄除知火山軍以病免大定初起知寧海軍  
秋禾方熟子方蟲生鑑出城行視蟲乃自死再遷鎮西  
軍節度使改河北西路轉運使致仕卒

富察鄭留字文叔東京路威泰必喇明安人大定二十  
二年進士調高苑主簿濬州司候補尚書省令史除監  
察御史累官北京臨潢按察副使戶部侍郎御史臺奏  
鄭留前任北京稱職遷陝西路按察使父順義軍節度  
使西京人李安兄弟爭財府縣不能決按察司移鄭留

平理月餘不問會釋其孔子廟鄭留乃引安兄弟與諸生叙齒列坐會酒陳說古之友悌數事安兄弟感悟謝曰節使父母也誓不復爭乃相讓而歸朔州多盜鄭留禁絕游食多蓄兵器因行春撫諭之盜乃衰息獄空賜錫宴錢以褒之改利涉軍節度使詔括馬鄭留使百姓飼養以須御史劾之既而伐宋諸路括馬皆瘦惟隆州馬肥乃釋鄭留大安初徙安國軍二年知慶陽府事三年夏人犯邊鄭留擊走之至寧元年改知平涼府是時

平涼新被兵夏人復來攻鄭留招潰卒為禦守計夏兵

退遷官四階貞祐二年改東京留守致仕貞祐四年卒

鄭留重厚寡言笑人不見其喜愠臨終取奏藁盡焚之

鈕祐錄守愚字仲晦本名和倫克們真定府路烏濟赫

明安人也六歲知讀書既壯或謂食肉昏神識乃戒而

不食性至孝父沒時年十五營葬如禮治家有法鄉人

稱之中明昌二年進士調深澤主簿治有聲遷懷仁令

改弘文校理秩滿為臨沂令有不逞輩五百人結為黨

社大擾境內守愚下車其黨散去蝗起莒密間獨不入  
臨沂境先是朝廷括河朔山東地隱匿者沒入官告者  
給賞莒州刺史教其奴告臨沂人冒地積賞錢三百萬  
先給官錙乃徵于民民甚苦之守愚列其寃狀白州州  
不為理即聞于戶部而徵還之流民歸業縣人勒其事  
于石改秘書郎母喪勺飲不入口三日終喪未嘗至內  
寢太常寺勸農司交辟守愚皆不聽服除除同知登聞  
檢院改著作郎永定軍節度副使泰和伐宋守愚為山

東行六部員外郎改大興都總管判官大安元年除修起居注轉刑部員外郎戶部郎中太子左諭德貞祐初除戶部侍郎數月拜諫議大夫提點近侍局二年除保大軍節度使改翰林學士參議陝西路安撫司事安撫完顏弼重其為人每事咨而後行未幾有疾詔賜御藥三年卒守愚為人忠實無華孜孜于公蓋天性然也

舒穆魯元字希明懿州路呼圖克明安人七歲喪父號泣不食者數日十三居母喪如成人嘗為擊鞠戲馬踏



歎曰生無兄弟而數乘此險設有不測奈何由是終身  
不復為補樞密院尚書省譯史調同知恩州軍州事遷  
監察御史為同知淄州軍州事劇盜劉奇久為民患一  
日捕獲方訊鞠聞赦將至亟命杖殺之闔郡稱快改大  
興府判官沂王府司馬沁南軍節度副使河內民家有  
多美橙者歲獲厚利仇家夜入殘毀之主人捕得乃以  
劫財証其人仇家引服賊不可得元攝州事究得其情  
尋改河北西路轉運副使累遷山東西路按察轉運使

貞祐初洪果烏登徵兵東平擁衆不進大括民財衆皆  
忿怨副統布薩素赫殺烏登於坐取其符佩之縱恣尤  
甚元密疏劾素赫擅殺近臣無上不道素赫坐誅移知  
濟南府到官六月卒元生平寡言笑尚節儉居官自守  
不交權要人以是稱之

張敷字伯英許州臨潁人大定二十八年進士調寧陵  
縣主簿改泰定軍節度判官率儒士行鄉飲酒禮改同  
州觀察判官是時出兵備邊州徵箭十萬限以鴈鴈羽

為之其價翔躍不可得穀曰矢去物也何羽不可節度  
使曰當須省報穀曰州距京師二千里如民急何萬一  
有責下官身任其咎一日之間價減數倍尚書省竟如  
所請補尚書省令史除同知鄭州防禦使事改北京鹽  
使丁父憂服除再遷監察御史從伐宋遷武寧軍節度  
副使居母憂貞祐二年改惠民司令歷河南治中隰州  
刺史刑部郎中同知河南府事遷河東南路轉運使權  
行六部尚書安撫使興定元年以疾卒穀天性孝友任

子悉先諸弟俸入所得亦委其弟掌之未嘗問有無云  
趙重福字履祥豐州人通女直大小字試補女直誥院  
令史轉兵部譯史陝西提刑知法遷陝西東路都勾判  
官右藏庫副使同知陳州防禦事宋謀人蘇泉入河南  
重福迹之至魚臺將渡河見前一舟且渡令從者大呼  
泉姓名前舟中忽有倉皇失措者執之果泉也改滄州  
鹽副使歲饑民煮鹵為鹽賣以給食鹽官往往杖殺之  
重福曰寧使課殿不忍殺人比歲滿課殿當降尚書右

丞完顏匡三司使按春知其事乃以歲荒薄其罰除織染署令大安三年佐戶部尚書張煒調兵食于古北口遷都水少監行西北路六部郎中治密雲縣俄兼戶部員外郎貞祐二年以守密雲功遷同知河間府事行六部侍郎權清州防禦使攝河北東路兵馬都總管三年河間被圍有劉中者嘗與重福密雲聯事勸重福出降重福不聽是時河間兵少多羸疾不任戰欲亡去重福勸其父老率其子弟強者戰弱者守會久雨圍乃解去

遷河東北路轉運使致仕元光二年卒

武都字文伯東勝州人大定二十二年進士調陽穀主簿遷商水令縣素多盜凡姦民嘗縱火行劫推埋發冢者都皆廉得姓名榜之通衢約毋再犯悉奔他境察廉遷南京路轉運度支判官累遷中都路都轉運副使以親老與弟監察御史郁俱乞侍尋丁憂服除調太原治中復為都轉運副使遷灤州刺史充宣差北京路規措官都拘括散逸官錢百萬入為戶部郎中權右司郎中

奏事稱旨被詔由海道漕遼東粟賑山東都高其價直募人入粟招海賈船致之三遷中都西京按察副使大安三年充宣差行六部侍郎以勞遷本路按察使行西南路六部尚書佐元帥穆延盡忠備禦西京有勞召為戶部尚書賞銀二百兩絹一百匹宣宗即位議衛紹王降封語在衛紹王紀頃之中都戒嚴都知大興府佩虎符便宜行事彈壓中外軍民都醉酒以褻衣見詔使坐是解職起為刑部尚書中都解圍為河東路宣撫使俄

以參知政事胥鼎代之興定元年以疾卒

赫舍哩德字廣之真定路珊沁明安人明昌二年進士

調南京教授察廉能遷厭次令補尚書省令史除同知

泗州防禦事監察御史大名治中安曹裕三州刺史厯

同知臨潢大興府事貞祐二年遷肇州防禦使是歲肇

州升為武興軍節度德為節度使宣撫司署都提控肇

州圍急食且盡有糧三百船在鴨子河去州五里不能

至德乃浚濠增陴築甬道導濠水屬之河鑿陷馬奔伏



甲其旁以拒守一日兵數接士殊死戰渠成船至城下  
兵食足圍乃解改遼東路轉運使軍民遮道挽留乘夜  
乃得去布希萬努逼上京德與部將劉子元戰却之遷  
東京留守歷保靜武勝軍節度使興定二年以本官行  
六部事三年以節度權元帥右都監與左都監單州經  
略使完顏仲元俱行元帥府于宿州四年遷工部尚書  
明年召還中都是歲卒

張特立字文舉曹州東明人泰和三年中進士第調宣

德州司候郡多皇族巨室特立律之以法闔境肅然調  
萊州節度判官不赴躬耕祀之韋城以經學自樂正大  
初左丞侯摯參政師安石薦其才授洛陽令四年拜監  
察御史拜章言鎬厲二宅久加禁錮棘圍柝警如防寇  
盜近降赦恩謀反大逆皆蒙前雪彼獨何罪幽囚若是  
世宗神靈在天得無傷其心乎聖嗣未立未必不由是  
也又言方今三面受敵百姓凋敝宰執非才臣恐中興  
之功未可以歲月期也又言尚書右丞延扎舒嚕遣其

奴與民爭田失大臣體參知政事圖克坦烏登諂事近  
習得居其位皆宜罷之當路者忌其直陰有以擠之因  
劾省掾高楨輩受請託飲娼家時平章政事博索犒軍  
陝西歸楨等泣訴于道以當時同席并有省掾王賓張  
為其進士故不劾博索以其私且不實并治特立及賓  
特立左遷邳州軍士判官杖五十賓亦勒停士論皆惜  
特立之去後卒癸丑歲年七十五

王浩由吏起身初辟涇陽令廉曰為關輔第一時西臺

檄州縣增植棗果督責嚴急民甚被擾浩獨無所問主  
司將坐之浩曰是縣所植已滿其數若欲增植必盜他  
人所有取彼置此未見其利其愛民多此類所在有善  
政民絲毫無所犯秦人為立生祠歲時祀之南遷後為  
扶溝令開興元年正月民錢大亨等執縣官送款于北  
大亨以浩有恩於民不忍加刃日遣所知勸之降浩終  
不聽於是殺之無血主簿劉坦尉宋乙並見害棄屍道  
路自春徂夏獨浩屍儼然如生目且不瞑烏犬莫敢近

殆若有神護者初辟舉法行縣官甚多得人如咸寧令  
張天綱長安令李獻甫洛陽令張特立三人有傳餘如  
興平師夔臨潼武天禎汜水党君玉偃師王登庸高陵  
宋九嘉登封薛居中長社李天翼河津孫鼎臣郟城李  
無黨滎陽李過庭尉氏張瑜長葛張子玉猗氏安德璋  
三原蕭邦傑藍田張德直葉縣劉從益皆清慎才敏極  
一時之選而能扶持百年將傾之祚者亦曰更得其人  
故也



金史卷一百二十八



總校官舉人臣章維桓

校對官助教臣李巖

謄錄監生臣謝雲

欽定四庫全書薈要

史部

金史卷二百二十九至  
三十二

詳校官編修臣程嘉謨





欽定四庫全書蒼要卷六千三百七十一

金史卷一百二十九

元中書右丞相總裁托克托等修

列傳第六十七

酷吏

高閭山

富察和卓

太史公有言法家嚴而少恩信哉斯言也金法嚴密律  
大雖因前代而增損之大抵多準重典熙宗迭興大獄

海陵翦滅宗室鉤棘傳會告姦上變者賞以不次於是  
中外風俗一變成尚威虐以為事功而讒賊作焉流毒  
遠邇慘矣金史多闕逸據其舊錄得二人焉作酷吏傳  
高閭山澄州析木人選充護衛調順義軍節度副使轉  
唐古伊埒圖紕詳袞改震武軍節度副使曹王府尉大  
名治中遷汝州刺史改單州制禁不依法用杖決人者  
閭山見之笑曰此亦難行是日特用大杖杖死部民楊  
仙坐削一官解職久之降鳳翔治中歷原州濟州泗州

刺史改鄭州防禦使遷扶餘路節度使移臨海盤安軍  
寧昌軍貞祐二年城破死之

富察和卓以吏起身久為宣宗所信聲勢烜赫性復殘  
刻人知其蠹國而莫敢言其子充護衛先逐出之繼而  
和卓為恒州刺史需次近縣後大兵入陝西關中震動  
或言和卓赴恒州為北走計朝廷命開封羈其親屬和  
卓出怨言曰殺却我即太平矣尋為御史所劾初議笞  
贖宰相以為悖理斬於開封府門之下故當時有宣朝

三賊之目謂王阿里富察耀珠和卓其一也興定中駙馬布薩阿哈之獄京師宣勘七十餘所阿里輩乘時起事以肆其毒朝士惴惴莫克自保惟通吉文之在開封府幕明其不反竟不署字阿哈誅文之亦無所問耀誅正大初致仕居睢陽潰軍變與其家皆被殺初宣宗喜刑罰朝士往往被笞楚至用刀杖決殺言者高琪用事威刑自恣南渡後習以成風雖士大夫亦為所移如圖克坦右丞思忠好用麻椎擊人號麻椎相公李運使特

立號半截劍言其短小鋒利也馮內翰壁號馮創雷淵  
為御史至蔡州得姦豪杖殺五百人號曰雷半千又有  
完顏莽伊蘇皆以酷聞而和卓王阿里李渙之徒胥吏  
中尤狡刻者也

佞幸

蕭肄

張仲軻

幼名牛兒

李通

馬欽

幼名韓哥

高懷貞

蕭裕

本名楊珠

胥持國

世之有嗜慾者何嘗不被其害哉龍天下之至神也一有嗜慾見制於人故人君亦然嗜慾不獨柔曼之傾意也征伐畋獵土木神仙彼為佞者皆有以投其所好焉金主內盡聲色外好大喜功莫甚於熙宗海陵而童宗次之金史自蕭肄胥持國得佞臣之尤者以七人皆被寵遇於三君之朝以亡其身以蠹其國其禍皆始於此可不戒哉作佞幸傳

蕭肄本奚人有寵於熙宗復諂事悼后累官參知政事

皇統九年四月壬申夜大風雨雷電震壞寢殿鳩尾有  
火自外入燒內寢幃幔帝徙別殿避之欲下詔罪己翰  
林學士張鈞視草鈞意欲奉答天戒當深自貶損其文  
有曰惟德弗類上千天威及顧茲寡昧眇予小子等語  
肆譯奏曰弗類是大無道寡者孤獨無親昧則於人事  
弗曉眇則目無所見小子嬰孩之稱此漢人託文字以  
詈主上也帝大怒命衛士拽鈞下殿榜之數百不死以  
手釵釐其口而醢之賜肆通天犀帶憑恃恩倖侶視同

列遂與海陵有惡及篡立加大臣官爵例加銀青光祿大夫數日召肆詰之曰學士張鈞何罪被誅爾何功受賞肆不能對海陵曰朕殺汝無難事人或以我報私怨也於是詔除名放歸田里禁錮不得出百里外

張仲軻幼名牛兒市井中無賴說傳奇小說雜俳優詆諧語為業海陵引之左右以資戲笑海陵封岐國王以為書表及即位為秘書郎海陵嘗對仲軻與妃嬪褻瀆仲軻但稱死罪不敢仰視又嘗令仲軻裸形以觀之侍



每令僕褫雖圖克坦單貞亦不免此兵部侍郎完顏布  
琳大興少尹李惇皆以贓敗海陵置之要近伶人千慶  
兒官五品大氏家奴王之彰為秘書郎之彰罽珠偏僻  
海陵親視之不為褻唐古辯家奴和尚烏達與家奴葛  
溫葛魯皆置宿衛有僥倖至一品者左右或無官職人  
或以名呼之即授以顯階海陵語其人曰爾復能名之  
乎常置黃金襖褥間喜之者令自取之其濫賜如此宋  
余唐弼賀登寶位且還海陵以玉帶附賜宋帝使謂宋

帝曰此帶鄉父所常服今以為賜使卿如見而父當不忘朕意也使退仲軻曰此希世之寶可惜輕賜上曰江南之地他日當為我有此置之外府耳由是知海陵有南伐之意俄遷秘書丞轉少監是時營建燕京宮室有司取真定府潭園材木仲軻乘間言其中材木不可用海陵意仲軻受請托免仲軻官未幾復用為少監海陵獵于托紐山次于遼韓酌天而拜謂羣臣曰朕幼時習射至一門下黜祝曰若非異日大貴當使一矢橫加門

脊上及射果橫加門脊上後為中京留守嘗大獵于此  
地園未合禱曰我若有大位百步之內當獲三鹿若止  
為公相獲一而已於是不及百步連獲三鹿又祝曰若  
統一海內當復獲一大鹿於是果獲一大鹿此事嘗與  
蕭裕言之朕今復至此地故拜奠焉海陵意欲取江南  
故先設機祥以諷羣臣是以仲軻每先逢其意導之南  
伐貞元二年正月宋賀正旦使施臣朝辭海陵使左宣  
徽使敬嗣暉問施臣曰宋國幾科取士對曰詩賦經義

策論兼行又問秦檜作何官年今幾何對曰檜為尚書

左僕射中書門下平章事年六十五矣復謂之曰我聞  
秦檜賢故問之正隆二年仲軻為左諫議大夫修起居  
注但食諫議俸不得言事三年正月宋賀正使孫道夫  
陛辭海陵使左宣徽使敬嗣暉諭之曰歸白爾帝事我  
上國多有不誠今畧舉二事爾民有逃入我境者邊吏  
皆即發還我民有逃叛入爾境者有司索之往往託辭  
不發一也爾於沿邊盜買鞍馬備戰陣二也且馬待人

而後可用如無其人得馬百萬亦奚以為我亦豈能無  
備且我不取爾國則已如欲取之固非難事我間接納  
叛亡盜買鞍馬皆爾國楊太尉所為常因俘獲問知其  
人無能為者也又曰聞秦檜已死果否道夫對曰檜實  
死矣陪臣亦檜所薦用者又曰爾國比來行事殊不似  
秦檜時何也道夫曰容陪臣還國一一具聞宋帝海陵  
蓋欲南伐故先設納叛亡盜買馬二事而雜以他辭言  
之海陵召仲軻右補闕馬欽校書郎田與信直長實實

入便殿侍坐海陵與仲軻論漢書謂仲軻曰漢之封疆  
不過七八千里今吾國幅員萬里可謂大矣仲軻曰本  
朝疆土雖大而天下有四主南有宋東有高麗西有夏  
若能一之乃為大耳海陵曰彼且何罪而伐之仲軻曰  
臣聞宋人買馬修器械招納山東叛亡豈得為無罪海  
陵喜曰向者梁琬嘗為朕言宋有劉貴妃者資質艷美  
蜀之華藻吳之西施所不及也今一舉而兩得之俗所  
謂因行掉手也江南間我舉兵必遠竄耳欽與與信俱

對曰海島蠻越臣等皆知道路彼將安往欽又曰臣在宋時  
嘗帥軍征蠻所以知也海陵謂實實曰汝敢戰乎對曰受恩  
日久死亦何避海陵曰汝料彼敢出兵否彼若出兵汝果能  
死敵乎實實良久曰臣雖懦弱亦將與之為敵矣海陵曰彼  
將出兵何地曰不過淮上耳海陵曰然則天與我也旣而曰  
朕舉兵滅宋遠不過二三年然後討平高麗夏國一統之後  
論功遷秩分賞將士彼必忘勞矣四年三月仲軻死冬至前  
一夕海陵夢仲軻求酒旣覺嗟悼良久遣使者奠其墓

李通以便辟側媚得幸於海陵累官右司郎中遷吏部尚書  
請謁賄賂輻輳其門正隆二年正月乙酉詔左右司御史中  
丞以下奏事便殿海陵曰知子莫若父知臣莫若君朕嘗試  
之矣朕詢及人材汝等若不舉同類必舉其相善者朕聞女  
直契丹之仕進者必賴刑部尚書烏達簽書樞密約索為之  
先容左司員外郎哈喇古勒任其事渤海漢人仕進者必賴  
吏部尚書李通戶部尚書許霖為之先容右司郎中王蔚任  
其事凡在仕版朕識者寡不識者衆莫非人臣豈有遠近親



疎之異哉苟奉職無愆尚書侍郎節度使便可得萬一獲罪  
必罰無赦頃之拜參知政事海陵恃累世彊盛欲大肆征伐  
以一天下嘗曰天下一家然後可以為正統通揣知其意遂與  
張仲軻馬欽宦者梁琬近習羣小輩盛談江南富庶子女玉  
帛之多逢其意而先道之海陵信其言以通為謀主遂議興  
兵伐江南四年二月海陵諭宰相曰宋國雖臣服有誓約而  
無誠實比聞沿邊買馬及招納叛亡不可不備遣使籍諸路  
明安部族及州縣渤海丁壯充軍仍括諸道民馬於是遣使

分往上京率賓路呼爾哈路海蘭路扶餘路泰州咸平府東

京博索路哈斯罕臨潢府西南招討司西北招討司北京河間

府真定府益都府東平府大名府西京路凡年二十以上五十

以下者皆籍之雖親老丁多求一子留侍亦不聽五年十一月

使益都尹京等三十一人押諸路軍器於軍行要會處安置俟

軍至分給之其分給之餘與繕完不及者皆聚而焚之六年

正月海陵使通諭旨宋使徐度等曰朕昔從梁王嘗居南京

樂其風土帝王巡狩自古有之淮右多隙地欲校獵其間從

兵不踰萬人汝等歸告汝主令有司宣諭朕意使淮南之民  
無懷疑懼二月通進拜右丞詔曰卿典領繕完兵械今已畢  
功朕嘉卿忠謹故有是命俟江南事畢別當旌賞四月簽書  
樞密院事高景山為賜宋帝生日使右司員外郎王全副  
之海陵謂全曰汝見宋主即面數其焚南京宮室沿邊買  
馬招致叛亡之罪當令大臣某人某人來此朕將親詰問  
之且索漢淮之地如不從即厲聲詆責之彼必不敢害汝  
海陵蓋使王全激怒宋主將以為南伐之名也謂景山

曰曰日以全所言奏聞全至宋一如海陵之言詆責宋主宋主謂全曰聞公北方名家何乃如是全復曰趙桓今已死矣宋主遽起發哀而罷海陵至南京宋遣使賀遷都海陵使韓汝嘉就境上止之曰朕始至此比聞北方小警欲復歸中都無庸來賀宋使乃還於是大括天下羸馬官至七品聽留一馬等而上之并舊籍民馬其在東者給西軍在西者給東軍東西交相往來晝夜絡繹不絕死者狼籍于道其亡失多者官吏懼罪或自殺

所過蹂踐民田調發牽馬夫役詔河南州縣所貯糧米  
以備大兵不得他用而羸馬所至當給芻粟無可給有  
司以為請海陵曰此方比歲民間儲蓄尚多今禾稼滿  
野羸馬可就牧田中借令再歲不獲亦何傷乎及徵發  
諸道工匠至京師疫死者不可勝數天下始騷然矣調  
諸路馬以戶口為率富室有至六十匹者凡調馬五十  
六萬餘匹仍令本家養飼以俟師期海陵因出獵遂至  
通州觀造戰船籍諸路水手得三萬餘人及東海縣人

張旺徐元反遣都水監徐文等率師俘海討之海陵曰  
朕志不在一邑將試舟師耳於是民不堪命盜賊蠭起  
大者連城邑小者保山澤遣護衛布琳二十四人各授  
甲士五千人分往山東河北河東中都等路節鎮州郡  
屯駐捕捉盜賊以護衛幹實為定武軍節度副使尚賢  
為武安軍節度副使富勒堅為昭義軍節度副使皆給  
銀牌使督責之時山東賊犯沂州臨沂令哈薩力戰而  
死大名府賊王九等據成叛衆至數萬契丹邊錄錦王

三輩皆以十數騎張旗幟白晝公行官軍不敢誰何所  
過州縣開劫府庫物置于市令人攘取之小人皆喜賊  
至而良民不勝其害太府監高彥福大理正耶律道翰  
林待制良穎出使還朝皆言盜賊事海陵惡聞怒而杖  
之穎仍除名自是人人不復敢言海陵自將分諸道兵  
為神策神威神捷神銳神毅神翼神勇神果神略神鋒  
武勝武定武威武安武捷武平武成武毅武銳武揚武  
翼武震威定威信威勝威捷威烈威毅威震威略威果

威勇三十二軍置都總管副總管各一員分隸左右領

軍大都督及三道都統制府置諸軍巡察使副各一員

以太保瓚都為左領軍大都督通為副大都督海陵以

瓚都舊將使帥諸軍以從人望實使通專其事海陵召

諸將授方略賜宴於尚書省海陵曰太師梁王連年南

伐淹延歲月今舉兵必不如彼遠則百日近止旬月惟

爾將士無以征行為勞戮力一心以成大功當厚加旌

賞其或弛慢刑茲無赦海陵恐糧運不繼命諸軍渡江



無以僮僕從行聞者莫不怨嗟圖克坦后與太子光英居  
守尚書令張浩左丞相蕭玉參知政事敬嗣暉留治省  
事九月甲午海陵戎服乘馬具裝啟行明日嬪妃皆行  
宮中慟哭久之十月乙巳陰晦失路是夜二更始至蒙  
城丁未大軍渡淮至中流海陵拜而酹之至宿次見築  
繚垣者殺四方館使張永鈐將至廬州見白兔馳射不  
中既而後軍獲之以進海陵大喜以金帛賜之顧謂李  
通曰昔武王伐紂白魚躍於舟中今朕獲此亦吉兆也

癸亥海陵至和州百官表奉起居海陵謂其使汝等欲  
伺我動靜耶自今勿復來俟平江南始進賀表是時梁  
山樂水涸先造戰船不得進乃命通更造戰船督責苛  
急將士七八日夜不得休息壞城中民居以為材木煮  
死人膏為油用之遂築臺於江上海陵被金甲登臺殺  
黑馬以祭天一羊一豕投於江中召都督昂與副都督  
富埒琿謂之曰舟楫已具可以濟江矣富埒琿曰臣觀  
宋舟甚大我舟小而行遲恐不可濟海陵怒曰爾昔從

梁王追趙構入海島豈皆大舟邪明日汝與昂先濟昂聞令已渡江悲懼欲亡去至暮海陵使謂昂曰前言一時之怒耳不須先渡江也明日遣武平軍都總管阿林武捷軍副總管阿薩爾率舟師先濟宿直將軍溫都敖拉國子司業馬欽武庫直長實實皆從戰海陵置黃旗紅旗於岸以號令進止紅旗立則進黃旗仆則退既渡江兩舟先逼南岸水淺不得進與宋兵相對射者良久兩舟中天盡遂為所獲亡一明安軍士百餘人海陵遂

還和州於是尚書省使右司郎中鄂博庫員外郎王全  
奏報世宗即位於東京改元大定海陵前此已遣護衛  
摩囉歡德哩布往東京欲害世宗行至遼東遇世宗詔  
使薩巴執而殺之遂還軍中海陵拊髀嘆曰朕本欲平  
江南改元大定此豈非天乎乃出素所書取一戎衣天  
下大定改元事以示羣臣遂召諸將帥謀北歸且分兵  
渡江議定通復入奏曰陛下親師深入異境無功而還  
若衆散於前敵乘於後非萬全計若留兵渡江車駕北

還諸將亦將解體今燕北諸軍近遼陽者恐有異志宜  
先發兵渡江斂舟焚之絕其歸望然後陛下北還南北  
皆指日而定矣海陵然之明日遂趨揚州過烏江縣觀  
項羽祠嘆曰如此英雄不得天下誠可惜也海陵至揚  
州使符寶郎律摩多護神果軍扼淮渡凡自軍中還至  
淮上無都督府文字皆殺之乃出內箭飾以金龍題曰  
御箭繫帛書其上使人乘舟射之南岸其書言宋國遣  
人焚毀南京宮室及沿邊買馬招誘軍民今興師問罪

義在弔伐大軍所至必無秋毫之犯以此招諭宋人於是宋將王權亦縱所獲金軍士三人齎書數海陵罪通奏其書即命焚之海陵怒亟欲渡江驍騎果桑欲誘其黨以亡事覺命衆刃剉之乃下令軍士亡者殺其富埒瑄富埒瑄亡者殺其穆昆穆昆亡者殺其明安明安亡者殺其總管由是軍士益危懼甲午令軍中運鴉鶻船及糧船於瓜洲渡江以明日渡江敢後者死乙未完顏元宜等以兵犯御營海陵遇弒都督府以南伐之計皆

通等贊成之圖克坦永年乃其姻戚郭安國衆所共惡  
皆殺之大定二年削通官爵人心始快

馬欽幼名韓哥嘗仕江南故能知江南道路正德三年  
海陵將南伐遂召用欽自貴德縣令為右補闕欽為人  
輕脫不識大體海陵每召見與語欽出宮輒以語人曰  
上與我論某事將行之矣其視海陵如僚友然累遷國  
子司業海陵至和州欲遣富埒瑋渡江富埒瑋言舟小  
不可濟海陵使人召欽先戒左右曰欽若言舟小不可

渡江即殺之欽至問曰此舟可渡江否欽曰臣得棧亦可渡也大定二年除名是日起前翰林待制大顗為秘書丞顗在正隆間嘗言山東盜賊海陵惡其言杖之除名世宗嘉顗忠直惡欽巧佞故復用顗而放欽焉

高懷貞為尚書省令史素與海陵狎昵海陵久蓄不臣之心嘗與懷貞各言所志海陵曰吾志有三國家大事皆自我出一也帥師伐國執其君長問罪於前二也得天下絕色而妻之三也由是小人佞夫皆知其志爭進



諛說大定縣丞張忠輔謂海陵言夢公與帝擊毬公乘馬衝過之帝墜馬下海陵聞之大喜會熙宗在位久委政大臣海陵以屬近為宰相專威福柄遂成弑逆之計皆懷貞輩小人從史導之海陵篡立以懷貞為修起居注懷貞故父濱州刺史贈中奉大夫懷貞累遷禮部侍郎大定二年降奉政大夫放歸田里五年與許霖俱賜起復懷貞為定國軍節度使上戒之曰汝等在正隆時姦佞貪私物論鄙之朕念沒身不齒則無以自新若怙

舊不悛必不貸汝矣

蕭裕本名楊珠奚人初以明安居中京海陵為中京留守與裕相結每與論天下事裕揣海陵有覬覦心密謂海陵曰留守先太師太祖長子德望如此人心天意宜有所屬誠有志舉大事願竭力以從海陵喜受之從與謀議海陵竟成弑逆之謀者裕啟之也海陵為左丞除裕兵部侍郎改同知南京留守事改北京海陵領行臺尚書省事道過北京謂裕曰我欲就河南兵建立位號

先定兩河舉兵而北君為我結諸明安以應我定約而  
去海陵雖自良鄉召還不能如約遂弑熙宗篡立以裕  
為秘書監海陵心忌太宗諸子欲除之與裕密謀裕傾  
險巧詐因構致太傅宗本秉德等反狀海陵殺宗本唐  
古辯遣使殺秉德宗懿及太宗子孫七十餘人秦王宗  
翰子孫三十餘人宗本已死裕乃求宗本門客蕭玉教  
以具款反狀令作主名上變海陵既詔天下天下寃之  
海陵賞誅宗本功以裕為尚書左丞加儀同三司授明

安賜錢二十萬馬四百匹牛四百頭羊四千口再閱月

為平章政事監修國史舊制首相監修國史海陵以命  
裕謂裕曰太祖以神武受命豐功茂烈光於四海恐史  
官有遺逸故以命卿久之裕為右丞相兼中書令裕在  
相位任職用事頗專恣威福在已勢傾朝廷海陵倚信  
之他相仰成而已裕與高藥師善嘗以海陵密語告藥  
師藥師以其言奏海陵且曰裕有怨望心海陵召裕戒  
諭之而不以為罪也或有言裕擅權者海陵以為忌裕

者衆不之信又以為人見裕弟蕭祚為左副點檢妹夫  
耶律必埒哩為左衛將軍勢位相憑藉遂生忌嫉乃出  
祚為益都尹必埒哩為寧昌軍節度使以絕衆疑裕不  
知海陵意據見出其親表補外不令已知之自是深念  
恐海陵疑已海陵弟太師充領三省事共在相位以裕  
多是用頗防閑之裕乃謂海陵使充備之也而海陵猜  
忍嗜殺裕恐及禍遂與前真定尹蕭豐嘉努前御史中  
丞蕭珠展博州同知約索裕女夫和勒博謀立亡遼豫

王延禧之孫裕使親信蕭托諾往結西北路詔討使蕭海呼海呼即懷忠懷忠依違未決謂托諾曰此大事汝歸遣一重人來裕乃使珠展往珠展前為中丞以罪免以此得詣懷忠懷忠問珠展與謀者復有何人珠展曰五院節度使耶律朗亦是也懷忠舊與朗有隙而珠展嘗上達蘭變事懷忠疑珠展反覆因執珠展收朗繫獄遣使上變約索亦與筆硯令史布達書使布達助裕以取富貴布達奏其書海陵信裕不疑謂布達構誣之命

殺布達於市執布達出宣華門點檢圖克坦貞得蕭懷  
忠上變事入奏遇見布達問其故因止之圖克坦貞已  
奏變事以布達為請海陵遽使釋之海陵使宰相問裕  
裕即歎伏海陵甚驚愕猶未盡信引見裕問之裕曰大  
丈夫所為事至此又豈可諱海陵復問曰汝何怨於朕  
而作此事裕曰陛下凡事皆與臣議及除祚等乃不令  
臣知之領省國王每事謂臣專權頗有隄防恐是得陛  
下旨意陛下與唐古辯及臣約同生死辯以強忍果敢

致之死地臣皆知之恐不得死所以此謀反幸苟免耳  
太宗子孫無罪皆死臣手臣之死亦晚矣海陵復謂裕  
曰朕為天子若於汝有疑雖汝弟革在朝豈不能施行  
以此疑我汝實錯誤太宗諸子豈獨在汝朕為國家計  
也又謂之曰自来與汝相好雖有此罪貸汝性命惟不  
得作宰相令汝終身守祖先墳壠以裕曰臣子既犯如  
此罪逆何面目見天下人但願絞死以戒其餘不忠者  
海陵遂以刀刺臂以取血塗裕面謂之曰汝死之後當



知朕本無疑汝心裕曰久蒙陛下非常眷遇仰戀徒切  
自知錯謬雖悔何及海陵哭送裕出門殺之并誅約索  
及豐嘉努豐嘉努妻豫王女也與其子穀皆與反謀并  
殺之遣護衛巴噶往西北路招討司誅朗及珠展而托  
諾和勒博皆出走捕得托諾棄市和勒博自縊死托諾  
出走過河間少尹蕭之詳之詳初不知裕事留之三日  
托諾往之詳徹珍家徹珍遣人詣之詳告公引得之付  
托諾遣之他所徹珍家奴發其事吏部侍郎沃辰鞠之

之詳曰托諾宿二日而去法家以之詳隱其間欺尚書省罪當贖海陵怒命殺之杖沃辰及議法者徹珍杖四百死已葛殺珠展并殺無罪四人海陵不復問杖之五十而已以裕等罪詔天下賞上變功懷忠遷樞密副使以布達為牌印云高藥師遷起居注進階顯武將軍藥師嘗奏裕有怨望至是賞之云

胥持國字秉鈞代州繁峙人經童出身累調博野縣丞上書者言民間皆冒占官地如太子務大王莊非私家所

宜有部委持國按覈之持國還言此地自異代已為民

有不可取也事遂寢尋授太子司倉轉掌飲令兼司倉

皇太子識之擢祗應司令章宗即位除宮籍副監賜宮

籍庫錢五十萬宅一區俄改同簽宣徽院事工部侍郎

並領宮籍監閱三月遷工部尚書使宋明昌四年拜參

知政事賜孫用康榜下進士第會河決陽武持國請督

役遂行尚書省事明年進尚書右丞持國為人柔佞有

智術初李妃起微賤得幸於上持國久在太子宫素知

上好色陰以秘術干之又多賂遺妃左右用事人妃亦自嫌門弟薄欲藉外廷為重乃數稱譽持國能由是大為上所信任與妃表裏擅朝政誅鄭王永蹈鎬王永中罷黜完顏守貞等事皆起於李妃持國士之好利躁進者皆趨走其門下四方為之語曰經童作相監婢為妃惡其卑賤庸鄙也承安三年御史臺劾奏右司諫張復亨右拾遺張嘉貞同知安豐軍節度使事趙愐同知定海軍節度使事張光庭戶部主事高元甫刑部員外

郎張巖叟尚書省令史傅汝梅張翰裴元郭郭皆趨走  
權門人戲謂胥門十哲復亨嘉貞尤卑佞苟進不稱諫  
職俱宜黜罷奏可於是持國以通奉大夫致仕嘉貞等  
皆補外項之起知大名府事未行改樞密副使佐樞密  
使襄治軍於北京一日上召翰林修撰路鐸問以他事  
因語及董師中張萬公優劣鐸曰師中附胥持國進持  
國姦邪小人不宜典軍馬以臣度之不惟不允人望亦  
必不能服軍心若回日再相必亂天下上曰人臣進退

人難人君進退人易朕豈以此人復為相耶第遷官二階使之致仕耳尋卒于軍諡曰通敏後上問平章政事張萬公曰持國今已死其為人竟何如萬公對曰持國素行不純謹如貨酒樂平樓一事可知矣上曰此亦非好利如馬琪位參政私鬻省醞乃為好利也子鼎別有傳

金史卷一百二十九